



郎潛集卷之三

東海高士之著

孫氏園天瑞明府餞飲畱別二首

遠遊非夙好出郊卽千端  
何況雙龍乖眷念惟古歡  
知已何容易惜別良獨難  
一樽對叢菊香聞如幽蘭  
九月更暄和山蜂時拂冠  
落日隱高樓復照白玉盤  
徙倚忘就道惻然熱肺肝

二

日暮始驅車行邁逝北林  
長河折危沙枯楊苑蕭森

月黑鴈驚語高飛越岡岑明滅遠邨火游雲怒以陰  
矯首望城闕仰見商與參班馬渡河鳴感慨遊子吟  
獨有如此水聊可鑒素心

走筆贈吳醫

逃名空谷尚名愚只好常居費老壺最愛王生有新  
句抄方無劑可醫迂

二

憐君古意愛君真瀟灑松風底下人鄉里未能知管  
輅兒孫誰復識劉晨

再赴南都別里中親友

更復栖栖去疎村十月時干旌乍一喜鄉里各憐私  
寒雨馬初瘦遠天鴻自遲離筵見真率擺落耐情悲

膠州趙氏兄弟陪遊匡氏嘉樹園

奇亭傑構倚滄浪瀟灑真同顧辟疆喬木千章宿雲  
物女蘿如帶足衣裳携來詞客憐諸少率爾清尊已  
夕陽傾倒卽當輸意氣休令隱者占清狂

十月望夕王孝廉兄陪登超然臺謁長公祠臺  
爲蘇公守密時作

孤臺天地擁城陂登眺千秋有所思月夜祇瞻人異  
世雪堂猶憶賦同時山川寒影樽中杳碑版荒文杖  
底欹凜不可畱明發待萬峰騎馬卽前期

葭菼行

葭菼飛如楊白花十月隕霜未殺草輕舟晨泛廣陵  
渡唼鳧眠鴈各自好山東江北殊氣候我來葉盡寒  
事早此中桅檣如竹林繁煙濃日薰晴昊估客往來  
袂成帷射利畏途競刀錐何況盜賊轉充斥藏舟不  
戒負之馳昨者畱都亂民譁姦錢鼓鑄敢豪奢京兆

開口遭打罵剝劫罷市諱官家邇時罪歲歲多凶粟  
賤錢滯皆病農訛言誰知其所始行錢擇字幾無從  
君不見漢家鹽鐵周九府至今大權輕於土百姓吞  
聲無所道達官坐船氣如虎南北一水何勞苦

再入南署述事

乞骸猶未可消息固遵時同舍齒差進一官肩尚隨  
舊交半去國新識轉憐誰四十龍飛曆班行鵠立期  
驚人隱齊鳥傲祖卽元龜政事存恭默 天王靜設  
施紛紜惟謝病權便改題知邸報看如幻朝章易似

碁福心常內癢多口獨調饑銷鑠金寧骨憂勞白間  
髭宦休關巧拙道各致高卑議論今何屆諸公願好  
爲

社集烏龍潭時病不克赴得韻麻字

僊曹清興追趨地物色平臨太液賒有客棲遲妨杖  
屨伊人咫尺隔蒹葭波清小艇開雲葉氣煖深杯送  
日車薄宦幸多同調者孤蓬能可直生麻

至日齋居作

齋居夜闌鳥棲迴麗月疎燈映閣梅一望金鋪鳩鵲

觀側思綺閣鳳凰臺天心欲啓微陽日 上意方深  
淵默雷不醉太常有清興寧知身已在蓬萊

冬日謁黃侍中表忠祠

眼血灑風淒冤魂斷柳迷相從有妻女先得是夷齊  
舊壘燕還去乾枝烏自啼哀雲埋短日萬古此清溪  
女士行十二韻紀沈相女節孝也

婺星奄歲紀忽向宋中馳日月沉幽魄冰霜儼令姿  
奈嗟雙白苦堅矢兩髦儀爲子能過半成夫亦在斯  
和平敦古處恭儉尚今師不忝求仁怨忘憂展孝私

高堂一日養同穴九原知杜宇啼深夜著叢長幾枝  
人倫已無憾骨血那禁悲正氣還川嶽香名載簡碑  
千秋頌曹女列國弔共姬何以標彤史慙無絕妙辭  
再集冶城分得高字

日暇開尊永天清倚劔高石城猶王氣朱閣自寒濤  
宮闕六朝靜江山千古勞狂歌抒遠思雲物俯神臯  
二得潛字

冬深風尚恬山翠落虛檐智井古煙聚鍾陵疎樹纖  
閣寒侵改席塔遠俯低簾嘯傲原吾道爲郎自可潛

曹公遠招同寮觀署中蠟梅和柯季和

臘意空寥問梅萼閒曹貪賞病中身香浮雨雪細霑  
酒玉立柯條清映人折去遠隨驢背跡開時不待隴  
頭春黃英欲破心還苦懶倚東風怕愴神

大雨諸子偕過瓦官寺分得佳字十六韻

冬雨原非意期寧命駕乖雪舟興難盡蓮社事尤佳  
濟勝青絲屐衝泥白鼻騎入門如彼岬幽閣忽高齋  
淨竹低披埒寒苔滑避鞋心微見空相趣澹得無懷  
芳樹輕澌裊天花淨土偕維摩空畫壁須達失金階

鑿齒纔堪半

時予病足自謔云然

侏儒亦大俳清歌度吳曲雅

語雜齊諧白鷺寒林影烏衣異代街論文及今日予

古又同儕城闕平還斷風雲暗復靈津梁疑咫尺法

界豈安排惠遠將無笑誌公今已埋也思補天漏踪

跡媿生涯

直宿署中值大雪是冬始見

融雨斜風欹枕外怪來南雪到應難忽疑暗室延虛

白無那輕帷射薄寒客子夢隨梅萼醒衙齋歲與竹

枝闌不知何似袁安臥面上疎涼攬鏡看

雪霽用前韻

年華行暮官堪臥月俸雖微酒不難罷雪山浮初日

動稍風樹薄野氛寒遲遲脚病興殊健種種鬢絲悲

未闌相約此時還好時鍾陵朝爽拄頤看

社中送丁子之蕪湖二絕句

識面恨不早往來誰與期君行隨鴈去還遲鴈南時

二

所恨俱為客仍分百里長看君閱行路能見幾同鄉

冬莫三絕句

鍾山旭色樹纖齊  
壓雪橫斜偃霧低  
無事放衙惟學  
睡隔牕高竹八哥啼

二

江南雪後雨還隨  
臘月青苔履跡遲  
樹樹冰花看內  
苑初疑月夜暮春時

三

山霧濃薰旦日黃  
小齋微入蠟梅香  
兒童強解南中  
俗除歲纔知是異鄉

送柯季和之揚州

歲晏日色淡寒江  
雨不絕晨起理商弦  
遽作雙龍別  
同袍匪無衣如蛩  
蟻相悅交臂亦何晚  
兒女情非屑  
况君去未遠無那中  
懷熱男兒墮地上  
肝膽如白雪  
感激在心期不啻自口  
說許與必古人磊落振高節  
君才本曠代淵穆洞以潔  
是行更攬勝清風隨車轍  
枕上廣陵潮瓊花秀可擷  
弔古富詩篇杯酒又難闕  
追隨遂莫逮嗟予徒蹇拙  
好音時復來慰我柔情結

歲杪徐園讌集用王長公韻二首

侯家臺館鳳凰城  
喬木芳泉細問名  
迴出罌恩衝象



緯斜連島嶼擬蓬瀛桂叢畱客不覺晚梅蘂含春偏  
有情宿雨濛濛石鯨動一時歡賞又狂生

二

名園傾國赴嘉招日夕歌鐘似六朝扇底翩翩垂手  
度梁間嫋嫋轉喉飄金魚覺煖微吹浪碧柳將春細  
拂橋永夜莫愁沾濕重教人常憶可憐宵

贈李本寧先生廿韻

昭代徵文獻他時草昧功詞場看汎濫簡帙許兒童  
繼起惟夫子論交及數公老成知作者心苦回良工

江漢尋源合崑崙積氣隆神超畫象外意得斲輪中  
韻協朱絲賞歌傳白雪空屈原才未有倚相學難窮  
天亦無勞問時真不易同一人存碩果七子盡飛蓬  
衆宿皆朝北狂瀾力障東卜居將汗漫大業極昭融  
折節形骸舍忘年臭味通不然齊楚境直是馬牛風  
識小聊吾好知玄豈足雄四唐今視昔兩漢始要終  
刻鵠寧求似登龍願已崇追隨葭倚玉黽勉藥添籠  
太史須多畜愚生利擊蒙下風幸趨侍莫負問崆峒

金陵除夕

南國先春全解凍溪雲山翠媚晴天歲華無奈只如此風俗隨人爭可憐及壯何知鬢髮薄迎年忽學兒童顛宦情歸計殊相惱癡夢悠悠自罔然

壬子元日

今日今年三十四壯心偏傍遠遊驚五更烟霧蒙天象列署衣冠尚帝京朝野卽相忘久道都俞又想及新正總緣畱滯思兄弟頌罷椒花百感生

二

又是新年歎陸沉閒曹乞米恨多陰天顏南北俱

難望日色玄黃迴自深雨雪將愁催客鬢江山換老損春心操音在昔憐莊舄慷慨聊爲東武吟

長干樓觀迎春曲時再集魏園

樓上凭欄拂柳條煙絲細裊女兒腰却緣若箇銷魂遽逗惹風前細雨飄

二

街鼓喧喧舐戲陳輕風薄霧綺羅春請看今日如雲者何似臨春閣下人

三

帝城應早啟東皇  
裘馬凝煙紫陌香  
春色故宮都不管  
儘教分領與僊郎

四

莫道驚心獨是梅  
千枝翦綵一時開  
誰翻玉樹傷情曲  
歌舞于今兩度來

五

佳人十五長干街  
樓上拋情賣眼乖  
故揭朱簾垂大袖  
不知遺却玉鸞釵

六

正月三日傾春城  
朝雲朝雨寒忽生  
那因沾濕愁羅襪  
強道官廊還可行

初春歸興四首

新春花勝燭眼盡  
日烏紗掉頭水解秦  
淮漲岬雪浮鍾阜  
當樓市兒紛騎竹  
馬世事真同棘猴  
故國草青愁望王  
孫若箇淹畱

二

江國春生羅綺清  
曹興滿雲煙輕裘  
快馬何事公子佳  
人侂邊飽聽歌前  
玉樹如聞步底金  
蓮繁華古今

良濟集 卷三  
重省轉覺傷神鬱然

三

臺畔親栽牡丹開遲海國春寒胡爲草次七載未值  
花時一看梅蘂菲微靈谷柳條婀娜長干暄晴恰宜  
放眼雨雪欺凌不乾

四

早春種樹其時更長新松幾枝耕作牛羊宜飽惰游  
僮僕恒癡一身落落如此八口栖栖在斯乞米猶然  
饑渴問君不去何爲

正月六日招李公本寧同潘景升吳翁晉蔡伯  
達曹公遠小集却賦爲贈

神合原知此物靈開尊問字卽忘形劒芒欲屬雲霄  
紫燈影微分雨雪青細數文章徵代易徐憐歌舞喚  
愁醒不論明日人俱得太史應占聚客星

社中再送柯季和之維揚題卷二絕

雨雪崢嶸去鷁斜蕪城夜火逼年華到時春色邀雙  
眼煙月揚州處處花

二

當年玉藥原無種近郭櫻桃亦有林自是使君僊侶  
在乘閒頻去訪裴謀

投刺行

新正御賜廊間行三寸之刺懷姓名望門欲投例不  
受闈者目睨似嗔余面生以茲迴鞍內慙作闈者於  
客何厚薄君不見鄉里兒曹結交深昏暮叩門猶啓  
鑰

咏氣瓶中小金魚

滿眼冰壺映朱魚象外旋乍看隔輕霧小有卽空天

占影侵燈大迴身簇錦偏上元紛媚色兒女恁相憐

二

金波依座晃銀燭匝屏歡一任虛明觸應難實相看  
初疑溟滓破更得沫濡寬知爾壺中樂波臣且劇乾

金陵元夕篇初唐體

佳麗千年地繁華天下稀上元渾不夜客子憺忘歸  
沉沉九陌月如水香香三橋人似螳煙霧密從羅綺  
生星河直自街衢起酒肉如山大功坊車馬逐隊長  
千里微行豈怕李金吾半醉略識張公子公子香輪

東坡集 卷三  
儼列行烏衣朱雀亦茫茫  
玻璃恍徹九微焰  
杯竿遙醒七寶光  
一山聯千燈  
千山綴金繩  
燿爾虬龍奔海舞  
俄驚珠斗入簾昇  
斗昇虬舞何多幻  
火樹銀花皆轉盼  
陳宮吳館若爲歡  
桃葉青溪不可辨  
士女徒憐極目勞  
兒童却未傷心慣  
觥戲矜隨采色  
呈空梁  
條罷歌聲慢  
忽憶燕山快  
昔遊駢闐街  
鼓弄珠毬北臺縹  
縹望仙輦  
燈市喧囂上酒樓  
小臣辭闕七八載  
天子垂衣四十秋  
帝力那忘酺樂賜  
郎官固是陸沉流  
只今佳節追觴詠  
詞客如林相蔭映  
春衫共對坐

冰壺晝燭徐翻懸寶鏡  
寶鏡冰壺爛綺霞  
輕寒內苑柳啼鴉  
炬作蓬萊宮裏樹  
綵飛鳩鵲觀中花  
謔浪歡娛又一時  
馬蹄窸窣各何之  
興深已失銅龍曙  
來歲同遊更阿誰

警雷電作

始雷正月異  
憂思浩難降  
霹靂驚穿石  
檐楹忽倒江  
白光飛暗壁  
青火劃虛牕  
天意傾危甚  
長陰惕此邦  
酬鄭應尼讀三子小草見贈之作

北方何寥闊  
後先有二李  
作者自不易  
末流遂靡鄙

誰言東西秦而僅僅三子陳詩辨國風合并聊比擬  
譬之於聲音擊缶鳴鳴爾代興徵大雅吾道其南矣  
君才多八斗造物被驅使幽造鬼神宅清析珊瑚菜  
卽令臭味同有之寧得似新篇極許與神若無千里  
兩生旣夙知予也笑相視昔賢矜中原壘壘執牛耳  
夸誕爲口實素心亦毋以庶幾振古響嚶鳴從此始

梅花塢觀梅五絕句

二 郊梅開萬樹侵滅帝城春折去憑誰贈相思奈遠人

二

三 清朝將進酒綠萼待空枝正爾風前惱誰從笛裏吹

三

四 北客驚初見繁英踏作泥江南春不惜一任下成蹊

四

五 清影千林瘦含春動陵闕何事鎮常陰開時不見月

五

采花須及時畱花且結子士女可憐心一年一回死

靈谷寺五里松

可怪萬人家白日常煙黛空翠俯仰間時與風雨會

陵闕表鍾山嵒嶸擁鼇背祇林接森爽長松五里對  
標疑承雲漢靜忽生湍瀨葱鬱眩眼睫勢欲無大塊  
澹瀨激潮音梵湧朝夕內得毋甘露降沾灑面如磧  
迴矗塔影齊細拂龍鱗碎神豁高潔中意得朋遊輩  
羣生扶自直葦蘿休無賴一浣功德水可以滌煩穢  
江南盛芬芳衆卉何多態丘壑儻容著弘景真知愛  
聊試采茹法攬衣庶云邁

答吳翁晉喜晴邀七子郊遊之作

來往江南未見春春遲怯雨返晴新朝曛故媚垂垂  
柳宿漲初平漠漠蘋躡屐移尊行樂地輕衫寶馬快  
遊人追隨莫負憐筋力解道諸公吏隱真

翁晉招遊高座寺看竹軒余以事先還

寺竹開穿傍巘隈高軒翠接雨花臺臺臨睥睨杖前  
墮軒殿雲霞衣上來底是春寒尚無賴何緣地勝却  
輕迴梅姿柳態都休意每對琅玕莫放杯

厲躬詩十六章

粵我鼻祖聿荒於東繁枝瓜瓞旣衍且蒙前代無徵  
名姓夢夢存者五世世篤其衷



篤衷伊何我考德至融融如春造物體備涵茹萬類  
挹之不匱命也勞止終勤且瘁

我伯慕俠然諾不侵義希李篤勇則季心媒釁無悔

違閔實深急難維何破家以任

東萊李篤  
全張儉者

嗟我慈妣知廢知興遭家不造茹荼飲冰棄藐二孤  
栝菴未勝瀝血出臂零淚沾膺

予小子出成童而癡專愚無二古人是思遠好賈生  
近接朱熹揚馬何人庶幾遇之

企其庶幾狂生自許又喜奇節氣如風雨恐顛爾躬

爰喪其所我考內嚴將忍怒汝

嗟予小子獲罪於天仁考脩背如隕深淵耳目旣廢

心志惛然願隨朝露懼墜厥先

黽勉從禮愴怳異世出門茫茫內比兄弟周處聞言

維以自勵官謗之速莫匪嘉惠

天監孔明神聽和平禍福不忒寵辱若驚毋易話言

毋苟功名狂馳日暮空忝爾生

豈不祇塞昊天之感軒后思道風俗則違臣僚諂訛

處士刺譏命不假易疇忍式微

臣出豎儒感憤內熱念欲叫閹九重幽絕願爲良臣  
無已則節勗我友朋瀝我肝血

天之翫禍則不肯悔政事泄泄澹然四海莫適爲恤  
以勤荃宰皇穹牖聰日躋乃改

咨予爲郎泮渙爾游致身則拙致君末由不聞伐檀  
素餐是羞譬彼藩羝孰卽我謀

我謀不臧三十已邁子舍仍虛無後爲大商瞿難期  
憂心昧昧思我先君搢其衿帶

中歲吏隱无咎无譽行藏委運進退有餘汲黯慕主

虞卿著書生世何届永持厥初

晏樂以夕趨市以朝時不我與母爲自昭死者可作  
生者不怵庶遠釁害竭爾嘒嘒

登報恩寺塔頂

危塔萬尋天地中側身聳立上玄通江搖練影西南  
盡閣隱珠光日月空斜避牕欄占宿雨倒聽松柏上  
昏風劫灰不滅諸天隱春草荒基異代功

寺以災未復

春署朝晴

梳頭閒署晚牕草澹初生徙倚能忘累疎狂故遠名

班鳩下庭慣  
松鼠溜簷輕  
爽氣竹梧合  
欣添雙眼明  
半峰菴看玉蘭盛花

苦遭陰雨春過半  
少放晴新花固多  
杏藥將無浣顏  
色梅香爭減鬪  
嵯峨一雙玉樹倚  
微暝十丈粉粧高  
欲醜不見金羈三五竝  
斜陽醺眼對婆婆

春日會西園

春寒劇太甚  
春衣仍多綿  
翳翳杉栝風  
積陰帶長阡  
雅會屏冠蓋  
禮數極自然  
曠莽生遠思  
水竹佳娟娟  
古石冒雲細  
老藤攢野煙  
園池侯家富  
町畦中方圓

頽壩開蒼蔚  
丘壑反深妍  
草色尊前青  
曲岬激通川  
藹藹羣彥賞  
綺錯紛周旋  
何似魏公子  
公讌矜時賢

二

二月鶯未至  
長松凝宿雨  
殘梅尚餘馥  
山茶艷自吐  
帝城暢蕭爽  
周原鬱膺膺  
鳳臺何寂寞  
春洲變寒莽  
靡蕪上衣袂  
古木當路俯  
池塘映澹碧  
朱魚歷可數  
蹇然類空谷  
草木隱百堵  
盛衰各一時  
聚散亦無苦  
卽論茲園舊  
眼中三易主  
菟裘願終營  
小人請農圃  
三月三日社  
集桃花塢  
病未能往  
却作呈諸公

病眼禁持惱酒尊春光實被誤銷魂數緣行藥衣裳  
緩却妬看花被襖存修竹又當成故事胡麻切莫返  
僊源後時追賞休重負桃葉仍聞曲裏論

寒食祁爾光招同社友汎舟得花字

青溪紅雨鬪春華令節晴風燕子斜僊棹浮樽開薄  
霧高樓垂袖掩朝霞淺眉映遠微舒柳醉眼看春時  
誤花不分追歡同李郭清遊流轉若爲賒

烏龍潭汎舟學艷體二首

潭水鏡虛空仙舟青翰同綺羅親薄日歌吹逆徐風

遠樹浮天外飛花落酒中眼醺逢境異似遣武陵通

二

游女紛成目嬌童妙轉喉微茫穿竹棹婀娜隔林樓  
繫柳青驄暮銜魚白鷺悠散曹欣得意不必諱風流  
春將暮行送曹公遠還陽羨

噫我涉世北復南蠢蠢意氣多不堪與君齊年甫過  
三予髮種種難勝簪君才岍睨清興酣湛如秋水斂  
霜鐔一往情深桃花潭青眼白眼時相參顧我而笑  
我誠慙埋照挫名猶未諳祇覺形穢內懷慙時事不

可以深談陸沉伍俗身早甘慎莫語人心爲快得君  
肝膽手自探豪舉雄視素所耽吾見猶龍真老聃鮑  
子乃知管不貪痛飲開懷要非婪江南春天靄蔚藍  
六代煙雲城闕涵追隨文酒樂且湛我馬玄黃君驂  
驪一日不見如眠蠶辛夷落盡春將暮君胡告行不  
肯住使我悶如鳩噎嗟忽忽自失空相慕銷魂千古  
江淹賦柳絮陰陰嚶鳴樹送者填衢花載路縹緲仙  
舟宮錦渡東山且臥謝太傅靈運放情山水遇羨君  
妒殺美無度而我何爲違心素乞米未休亦大誤小  
去三山蒼蒼滿春霧

擊楫行送鄒駕部道卿之京

三月白門楊柳飛嚶其鳴矣春陰稀江深放棹微雨  
暝岸花猶映宮錦衣豈無居人叔洵美慎莫說詩鼎  
還非才旣儻異仕復達於古難有真光輝少年如此  
朝野重開口破的爭百中功名斷不後王謝詞賦已  
往凌屈宋酒酣突兀性靈出劔歌慷慨肝膽用杖底

時追白社盟  
筵中屢變江南弄  
只今奏最向承明  
破浪中流擊楫聲  
那堪把袂傷離思  
何限彈冠知己情  
仕宦南北俱不惡  
答報昇平在此行  
化成天子久  
恭默前席將無問  
賈生

游女行

雨花臺邊花欲語  
時春將莫多游女  
珠綦雜遝動微塵  
紈扇輕揚遺近渚  
仙桃細逐歌舞飛  
翠竹開風露  
畫衣斜陽薰眼醉  
難舉弱草縈心昏  
未歸誰家蕩子青  
驄隊羅綺徐迎花  
片碎有人似住宋  
家牆調客忽  
貽交甫佩繁華  
前代又今時  
江漢懷春益  
泳思禮防  
珍重休相瀆  
邂逅還稱  
大路詩

清涼臺卽席送曹公遠分得魚字

高臺爽合寺門紆  
匹練遙看掛席初  
對酒暫同聽杜宇  
拂衣遮莫憶鱸魚  
石城隔岬山迎棹  
寶地分題客判裾  
到處王孫芳草綠  
教人也只念吾廬

二

憐君湖海氣難除  
況復詞名似子虛  
靈運勝情期放浪  
曹丘高義要吹嘘  
少年結客人依玉  
故國經春食

有魚卽向路旁看駟馬何殊負弩引相如

何天玉招飲疎園看牡丹

名花對酒艷香深檻外矯癡一滯淫魂倚蘭缸拂垂  
手色薰玉笋快披襟紅芳紫萼名難有側露欹煙思  
不禁却愧形容漸疎醜年年轉異看花心

雨後再看疎園牡丹

爛熳頻期興不違牡丹春與殿芳菲嫣然怯雨垂垂  
弱率爾翻風片片稀綺席自親煙霧質艷葩猶掩蝶  
竦輝故園事事輸南國見此躊躇亦當歸

李本寧詩俊白門之社賦謝十絕句

自得論文霧一披千秋定價屬何誰夸浮跋扈俱休  
諱作者端爲後進師

二

紛紛年少罵王李江左風流今在茲彼一時人合塵  
土滔滔河漢不須疑

三

不見江河百折東非今非古競稱雄荒涼前代華林  
館自有鳴蛙豈爲公

四

遊士爭馳子墨林那無縫掖動人欽不應定從先公等誰識當時脫穎心

五

自有詩書廢結繩遊睢滌績愧無能後來論定誇奇事三李明時獨代興

六

祇應鮑謝後升堂萬古難窺宋玉牆近世頗多愛陶體桃花不再見漁郎

七

建安之後踵開元斷斷於今尚衆喧作者偶窺神合理詞場不必說中原

八

琢月追風常不盡瀉江翻海互相驚柳花細逐方塘雨春草年年却更生

九

白社詞盟三十人紛披麗句等心神爲煩擬議將能事取醉春來有數巡



十

老成許與豈無試詞翰縱橫真足豪珍重前賢耐可  
見莫教容易視吾曹

遷居述興

卜居何去何從爲客自南自北怪得入門如舊城中  
亦有相識

二

池亭活水一灣書籍眠雲半間座上時通爽氣牆邊  
側挂鍾山

三

竹樹生煙刺眼籬籬依逕牽裾銜杯自來黃鳥投食  
時上朱魚

送吳翁晉光祿上計之京

吳生一官不救腐儒貧胡爲低眉抑塞長傍人憐君  
骯髒不得意却悔昔日誤拋頭上巾何門復得曳長  
裾長揖頗礙禮文拘君雖白眼不能酒似亦無用步  
兵厨薄俸幾何米五斗假貸逢人常噤口冠蓋徵逐  
費往來妻兒交謫掩耳走君獨自憐計非左仕宦游

戲無不可衆看委蛇聊醉時卽向跋扈又知我憶昔  
豪俊美少年公子傲睨春花筵論文獨據弇州座躡  
屐時拍髀中肩轉眼風流遂塵土富貴鼻息生雲煙  
寒士總難迴一盼遊客實不直一錢微官僅得鵠類  
鶩對人或復夔憐蚘如今炎暑帝京遊征衫厭浥塵  
蒙頭慷慨異地儻有遇燕市昔多荆高儔荆高不見  
君當醉一哭爲我更問王季木

巨源王孫宴坐齋

城市隱曲折入門不知處樓閣藏小山虛室六時曙

微通幽蘭馥間引風花絮冥心契機緣止觀兩無據  
忍草滋春雨黃鳥狎懶去本印粲可秘亦許八公與  
偶來一偃息已覺祛百慮寥聞動神爽應手將悟錄  
精微未能語天雞見空翥

好脩堂歌贈巨源王孫

王孫瀟灑誰得似內美脩能清擬水杏梁桂繚雲氣  
來高冠長佩紛委旒此堂聚書一萬卷竹風蕙露常  
在眼淮南詼詭河間隱爲善之樂茲復踐 天子萬  
年四海清逍遙爲庶賓客迎通親已誤曹子建災異

寧問劉更生淹留招隱千秋賦窈窕思君異代情丹  
成他日應無戀雞犬休看地上行

初夏南郊讌集分韻四首

轆轤天初暢恢台夏復晴玄都長日靜泰時野雲平  
迴擢金莖出遙思玉輦行醴泉應靈氣 帝澤萬年

清

二

闕殿陳千仗春宮肅百靈野光分積翠天氣一空青  
簫管疑虛發松杉只畫扃鍾陵瞻咫尺漢道自遐齡

三

石壇花欲暝千騎想霓旌玩世寧方朔思玄問廣成  
薜蘿幽徑隔杖杜野孺生冠冕驚詞賦興懷亦至情

四

當時誰侍從天樂百年聆芝向齋房秀莫搖合殿青  
甘泉將有作宣室未無靈却望星辰北依稀夢大庭

城南王氏山林卽事兼贈主人

咫尺亦丘壑應接眼忽眴花枝紛狼籍竹石射葱蒨  
春光想穠郁萬樹桃紅片雅會適不逢倏覺夏禽變

招邀愜心素入門爲胡旋曲塘清暉延涼室和風扇  
朱魚浮徑尺滿百相激濺投食應唐答矜重或迴盼  
得無驚蛟龍歛然風雨戰簸蕩江海翻閔閔雷霆纏  
神靈似有爲狂耽勞群彥綺散芍藥欄香雜鮮鱠饌  
碩人此卜築道德扶清宴高風儼曠邈當世可會面  
健步佐遊癖亦異人之僕思倣古賢侶謝傳與許掾  
煙絲駐濕雲暮景遲深眷漉漫詠長詞一續耆舊傳

借史紹卿梁有實兩僚兄遊牛首山

江山會者佳而況茲勝名那無獨往懷提携兼朋情

出郭神若洗陟巘體旋輕秀色灑眉宇夾道竹柏迎  
翠微延馬首悠然聞鶯聲遂覺野意親長日眼倍明  
何待上方到回向慙綫纓

二

趾仰躋森窅累息凌丹梯登頓轉嬰跚歷處互高低  
草香閉幽徑深樹網雲霓江色摩尼隱反影平田畦  
春霧隨足破前山與胸齊佳泉亦在眼涼若醒金鏡  
曾顛鐘磬落龍出鳥時栖澹然得定觀此身何更迷

三

香氣發衆妙燈影散近遠重閣牖暗光風林殷牀晚  
塵空一以拭自性本無損臥深毛髮空覓身還自忖  
山虛益突兀臺殿得安穩心涼耿無寐夜鳥鳴層巘  
亂樹杳思避懸石浮圖偃談說足老宿清供禪悅飯  
頓漸不二門誰代知冷煖卽此引鹿車久行而得返

倒影

微白漏門影倒正寧茲塔問人人俱見問影影不答

風竈

火風人不識又識幻中幻廣分法喜食驅使燭龍慣

桃花館

在牛首西塢

幽館隔深蹊時度嶺上鐘西來朝爽遲面目別羣峰  
石壁知雨潤古樹罅霧濃蒼藤大於甕千尺走長松  
根抵承若案柯幹矯相從落落蟠厚地蜿蜿驚虬龍  
神物不易有眼界豁心胸杖屨頗陵競草色雲磴封  
曲澗傳人語徐風聆暗淙造遠將自我苔深識遊蹤

祖堂

森木接曲折背山臨其陽開穿絕峭壁朱閣爛飛光  
到門不見人日午聞琅璫鳥語寺轉寂巖洞隱清涼

始知懶融意坐銷炎夏長泉雷虎跑異龍歸鉢孟香  
至人卓錫地神妙體難常翠竹連階級交加隨低昂  
紺殿曾空迴何處爲上方複道內引屬勢儼具津梁  
嗟我下根劣勞擾渴思漿胡爲久藤葛攬睨心茫茫  
獻花巖時汪君倩亦至

茲巖馬上看勢若揖北山牛首互賓主雲煙相往還  
谷響松風遲隨意到禪關怪鳥啾噴吟野花掃拂斑  
憑虛俯突奧入迴聞潺湲快友颯然至携手再破顏  
飛軒坐深晝清論如循環又復及杯酒返照芙蓉殷

石逕偏側內蘿薜紛躋攀蒼鬱造境險遂疑非世間  
蒼蒼帶暝色遊人亦不閑因緣解糾纏聊足砭我頑

郎潛集卷之四

東海高出孩之著

天界寺集分得送字

城隅開窅奧長日繁陰送窈窕幽造迷初疑在巖洞  
殿閣憑危岑飛梁接丹虹古木攢藻井細雲冒虛棟  
竹梧刺人眼好鳥參差哢喧寂豈二境車馬來亦衆  
畫欄貼睨臨綺疏日影空梵磬午度林風旛晚不動  
名理妙俱析疑義時一中我獨胡病暍在醒常若夢  
四大偶控搏徒爲造化弄何當解結繫永豁無明痛

攝山棲霞寺同汪君倩史紹卿賦

策馬穿雲到客遲  
幽溪松栝接參差  
珠光尚隱徵君宅  
雨色疑來靳尚祠  
鐘磬天深杳然去  
醍醐日午冷於斯  
却憐紗帽親愁病  
還愧碑銘江總持

二

林迴谷口遠  
芊綿翠壁泠泠白  
鹿泉自語迦陵佛  
日靜忽開蒼筍春  
雲鮮陰陰竹宇衆  
香發裊裊藤梢層  
閣懸曉色冥濛飛  
錫外神僧渡虎是何年

三

層巔突兀夏雲栖  
決皆全歸萬象低  
天矯蟠龍原自北  
蒼茫白馬復從西  
龜鼉宮壓江帆隱  
虎豹巖深陵樹迷  
獨有山川閱人代  
憑高身世想提攜

千佛巖

千佛亦不盡  
摩崖那更添  
巉巖依色相  
嵌竇具莊嚴  
詫俗偶爲異  
觀身聊未嫌  
古來好事甚  
又憶龍門纖

天開巖

峭石三峰削  
蒼松半嶺分  
空穿度林磬  
幽出隔江雲  
地遠開陳寺  
崖新琢禹文  
導僧欣解事  
爲遣從人聞



從棲霞趨弘濟行經鱗魚廠

江折春城樹隱山危樓丹壁鏡光間長風蹴浪高於  
日牒子船輕自往還

二

薦新時借尚方名守衛依然下馬行此地攜錢買不  
得城中蚤有五侯鯖

燕子磯歌

誰擲一拳石迸落江之溜波濤日夜互吞吐  
日吁高危春潮蕩瀟鬼神怒殷殷微聞馮夷鼓獻寶

豈有鼉鼉宮燃犀欲燭支祁府亭子憑高偏側孤削  
成根柢承虛無遠帆自破碧天去北岬山青南岬俱  
足底漏洶涌江光穿隙孔心神怯谿谿長嘯覺震動  
奇險將毋煩天功鐵絙周設防虞同欲令壯士復擲  
却萬里一息從長風

弘濟寺觀音巖

悄然八荒內棲此高雲岑四極奠已穩孤巖根定深  
江穿鴻濛氣石割煙霞心開闢常不壞樓臺方至今  
日光蕩沙嶼帆影沒空林狎見鯨鯢吼飽聞鐘磬音

白鷗宿檻底馴鹿臥城陰石壁瞰層殿筍蘆交遠潯  
我生可憐子是日惟悲吟時予有私感焉擺落將問法清涼  
聊豁襟潮翻天晶晶岼動野森森風雨生古樹浮圖  
還夕禽興豪行屏杖事觸念投簪浩蕩閻浮世何時  
可重尋

梅花水

在弘化廢寺

到寺猶迷路穿橋竹筍重方池不盈尺翠壁銜蒼松  
甘露自同潔醴泉應失濃僧房夕照寂衆響答扶筇  
嘉善寺石壁短句

奇石參錯如假山納日穴風雲氣關寺鐘渺然不知  
處青天倒入玲瓏間古往今來誰好事此石頑重不  
可致何況屋小置放難高歌危坐興長歎

登嘉石閣

幽壑穿巖更上樓凭欄萬木夕陽浮青天寺外千峰  
落白下城邊二水流錦石煙雲依寶地滄江東北向  
神州此中日月藤蘿緩身世同歸萬古愁

幕府寺

山帶層城盡林迴野寺重天吞後湖水日墮夾蘿峰

千古悲荒壘探幽到夕鐘江流奔萬馬側憶舊從龍  
達磨洞

西來亦多事不識遂空歸石抱春雲冷江連夜雨肥  
葭蘆深夕浦鷗鷺立空磯暝色銜天際餘光上我衣

山行卽目

城郭深藏百村松杉曲帶層墩賃舁携壺遊暑打鼓  
鳴鑼避瘟

二

白門楊花覆席北郭桑陰罩巾近寺逢僧作禮誰家

少婦看人

喜姚百雉至有懷舊會輒贈短韻兼寄張平仲

浩蕩驚離會孤雲眼外青相逢南國草却羨北流萍  
十載官如鬢千秋客自星酒狂憐舊日公子未應醒

姚百雉期集鷲峰寺遇吳允兆陳山甫譚執述

遊爰及存歿各賦近體亦寫鄙悰

神交舊識又新知細語僧寮松影遲略盡應徐憐季  
重追惟嵇阮託延之逢人病起饒清思好客情深恐  
後時鮐背將歸相見晚却緣開口喜兼悲

五月月夕作

南國流螢早昏樓一點斜  
欹風偏伴月穿竹故低花  
畫扇輕時掩羅衣薄未遮  
爲憐照顏色獨識莫愁家  
蔡伯達招同臧用甫羅玄甫姚百雉山人集蕉  
飲亭卽席送允兆還山分雲時二韻

官舍饒修竹遊踪類白雲  
清狂詩好我談笑病憐君  
客老益輕世交新殊戀群  
長齋蔬菜共話別意微醺

二

延陵君子遇縞帶卽前期  
晚竹燈邊暗初星屋角垂

丁年家遠處甲夜客分時  
南北雖無預歸心也自隨

魏氏兄弟歌

魏氏兄弟如美媛但聞其人不可見  
何門長裾曳若雲公侯座上眼欲眩  
投謁無能致井丹登臨雅自便  
許掾詩裏大名二陸齊畫中能事三絕擅  
有時逸興寫長圖新意尤多風格變  
旁人片紙豈易得客有轉致一便面  
豪貴屏障羞姓名窮巷車轍寧貧賤  
秣陵夕煙千花橫白鷺放舸江潮鳴  
神僊中人足氣岍風塵以外皆勝情  
第五何用誇難弟陽瘖無事避先兄

要令碌碌常在眼伯仁仲知空崢嶸與子亦不須相  
識小隱大隱誰當明子試畫我丘壑內對之可以添  
杯罌長夏風雨忽生肘贈子聊爲棣萼行

夏至後二日卽事

炎候乖恒期五月猶屏扇雌風時中人陰陽鬱相戰  
九衢偏祈禳客子希會面瓜茗足清娛復焉展良讌

二

麥秋亦不蚤蠶熟稻苗急天行妬已臨雲氣熅不濕  
田田淺池葉白鷺迎人立肉食亦攢眉代憂爲相及

范際明齋頭同僚夜飲

高齋漢署郎羣坐據胡牀潦倒猶中聖謹呼不諱狂  
星臨青玉案燈艷綺琴囊醉眼看如此題詩識樂方

菘竹五章寄壽太青子

菘竹在庭其陰在戶飛鳥遺音於我堂下君子百福  
錫用純嘏

菘竹在野其陰在庭好合聲應鐘鼓琴笙君子百福  
百姓和平

衍衍維遊殷殷維休民之歌之神聽具猶令儀令名

百祿是道

六之日煌煌振萬其鏜鳴佩鏘鏘玉瓚流英篤爾百  
祺父母悅康輿人作頌報以長生

六之日嫵嫵吹箎考鼓薄言觴者維山之笄薄言釣  
者維江之鱖君子燕喜遠將祉予

海上遊僊詩

戎戎方丈雲霏霏朝微雨軒軒雲中車熒熒車中女  
翩翩過三山盈盈清淺渚雖不見其人朗聞天上語  
招招同車子仙仙懷遐舉悵望長風逝慊慊思儔侶

伏日徐園避暑時予適未預

上公池館閉門幽洞壑虛涼六月秋稍許子猷來嘯  
詠誰言陶令不風流東山屐遠空前哲河朔杯深悵  
昔遊不獨病餘仍止酒生平未識富平侯

送劉載甫謁還汝南

最愛論心屬和詩鍾陵朝爽白雲司翻憐苦熱還家  
日漸是悲秋望遠時愛子娉婷臨月桂美人縹緲隔  
江籬才名不負爲郎薄歸及尚書他日期

送謝哲甫比部暫還金谿

弱冠忘年侍舊遊交新灑落重堪酬才驚謝朓風流  
在署擬馮唐德業優三徑暫開奔野鼠孤帆不繫逐  
輕鷗客中轉厭歌驪苦畱滯心飛無那愁

署亭間題

伏日蒸高枕庭柯眷夕暉微丹桑扈語小碧豆娘飛  
苦熱妻妾怨因貧僮僕歸觀池聊獨笑瀟灑芰荷衣

夏過國華王孫青溪園

清涼臺館碧溪灣掩映晴牕畫舸閒鎮日鷺鷥浮鏡  
裏異時雞犬到雲間兔園雅自畱枚叔鴻寶終難秘

小山麗景紛然能奪目對君深暝不知還

送陶開普滿秩之京

爲是清狂調合難北遊輕作別離看行時八月風雲  
壯到日千官劔佩歡前席定難忘賈誼虛幃休苦悼

潘安

開普新悼

憐君朝雨孤帆渡折贈蘼蕪江上蘭

漫題

謝客晝常臥冷官秋又來好書無力買止酒不時開  
江漢滔滔至風雲漠漠迴俸錢供脫粟拚使故人猜

和鄭應尼秋海棠詩

秋花微弄態短葉背凝殷衰露含香粉垂風笑玉環  
弱搖寒砌下嬌倚素屏間却愧陽春候爭時取媚顏

又

亦伴芙蓉盛將欺苗苗衰紛披奪眼日搖蕩斷腸時

花一名斷腸

愁睡羞妃子無言怨息媯江天秋夜寂寒藥

惱春思

木末亭醉歌

有方正學祠

秋氣突兀天晶晶深壑高雲來怒爭木末古亭遠色  
寂可以北望鳳凰城松杉淡煙宮闕露巖巒奔走長

風生塔尖日落半城沒雨花草長孤臺傾嘉會滿堂  
才傑士素霓赤電揮縱橫激昂歌罷聲忽曼慷慨尊  
前酒復盈百慮自煎髮種種萬事空勞眼營營孰得  
久者百年物夫何爲哉身後名野祠冤魂深樹夕赤  
土燐燐血花碧耳熱毛豎不自覺蕭蕭天鳴斂精魄  
古人意氣自有爲齷齪之徒服巾幘千金難抵一醉  
鄉十千三萬君休惜初夜白擁江光開鍾山倒影銜  
深杯欲去不去臨高臺城中萬戶繁華裏昔人不知  
今人來君不見王謝蕭陳安在哉



贈林茂之山人

名家逸氣故翩翩近住烏衣美少年好事動爲詩裏  
畫夙因早悟酒中禪江山野服尋幽屐歲月空囊賣  
賦錢簡懶貴人誰識面華林秋月臥蒼煙

九華行贈吳子寬生

九華之名昔見青蓮詩思欲凌風一往觀其奇江介  
秋高黿鼉吼西瞻落日雲霞馳半生僊賞願徒違裹  
糧莽蒼何由追華陽真人詒瑤草將介吳生一見之  
吳生亦是謫僊人芙蓉峰下紫芝春白日時邀靈囿

住或瞻鸞鶴接登真帝恐見罰莫浪語青熊白鹿常  
爲侶此山化作九老子愴悅相遇忽無所前有李白  
後高出吳生吳生何處可容汝

秋日亭子遣意

江日清無畏天風怒故吹早乾經頗駭卑濕減差宜  
瓜菰垂枯架雞鴉下涸池陳人似秋草蕩折一年期  
亭夕

疾風高柳折忽雨薄衣寒八月雲物幻孤亭秋事闌  
陰蟲淒暗斷螢火互難安吾計乾坤內狂歌抵自寬

秋夜聽榨酒注甕聲

糟牀靜夜注宮徵轉蕩罌冷奪金莖切疎添玉漏驚  
狂心隨滴瀝醉耳亦分明五斗先生史兼宜述此聲

感運

四言六章  
賦時命也

翼翼我亭爰止爰處江日載昏疾風以雨高木怒號  
百卉自語我之饑矣他方伊阻

翼翼我亭載北其牕風雨連夕耳聞倒江反反委葉  
淒淒零淙靡蕪實繁我懷靡從

運轂逝大化倏遷孰令昭旦匿景悲泉撫翫琴書

還返故山綿綿我愁莫之敢言

豈不念歸江介多風石尤率厲舟楫靡通翳彼高雲

婉婉遵鴻慨想彌襟寤寐有忡

爰遣僕夫母復謂假曾是俗情爾知蓋寡脩我田廬

敦我鄉社煩中絮語以勞行者

紛紛落髮每櫛盈梳耳鳴腦暈少壯其徂形骸匪戀

厥惟後圖妻妾對歎仰風躊躇

憶故山

北山采藥秋流水引獨往林木濯疎雨巖谷振空響

海色平遠天白雲指諸掌漏罅尋源入身度飛鳥上  
孰令微尚阻自結煙霞想他事非其任骨相本草莽  
永謝纓綬願庶狎樵牧長仕宦尚書郎夙約幸無爽  
不寐

細數夜如何煩心百種訛疑風開戶竹聽露滴牕蘿  
鬪鼠啾啾急啼蛩切切多中年仍不達華髮待消磨  
城南汎舟行和蔡伯達時偕赴臧用甫之招

秋高江水流城墻上客金尊連野航衰柳葉稀噪夕  
鵲古堤草短眠白羊荒蘆平岸輕風漲布幔羅衫畏

日當三山欲墮歌聲底百歲都銷醉眼傍起踏百尺  
舊時橋欹仄欄杆泣暮潮仰看孤鴻頭上過寒雲深  
黑天蕭蕭

弱侯太史招同祁爾光蔡伯達史紹卿遊吉祥  
寺遂入山三里看桂叢分得山字

招提谷口閉松關城內人稀解往還窈窕初疑天地  
外菁蔥忽失有無間林香野徑通三里江雨人家隔  
半山不是登龍僊侶盛何緣叢桂得同攀

九日工部園亭分得豪字

江南節遍初重九賓客林亭亦足豪卽脫衣冠堪對  
酒若爲風雨罷登高梧桐墜月秋深老菊藥遲霜歲  
閏勞安得年年知已在紫萸常好伴持螯

喜趙季卿宮諭校士至白門

故人肝膽是客子別離禁略記歡娛面初知邂逅心  
江雲映宮錦月樹燦南金隔歲期深語還愁不可尋  
寄懷李考功若蒙

相知衆人外相憶十年餘江國丹楓雨臺城白草墟  
關時崇有論玩世絕交書近事欣茅茹深憑慰索居

送季卿典試還朝

九年苦憶追隨地十日爭歡離別筵物色畢收多士  
俊風流尤識近臣賢暮雲沉紫開秋驛江葉飛丹送  
客船試過廣陵應作賦瓊花芳樹爲君妍

送邵太史芝南典試還

秋色江帆照錦衣如雲賓客列朝暉對揚不負弓旌  
賁光寵爭看劔佩歸城古石頭斜照斂山遙天目夕  
煙微十年聚散輕惆悵別思深隨斷柳飛

寄贈董光祿葆元

相憶無處所隔年音信微真才開德業直道合樞機  
謬以追隨失因之來往稀園亭能再過竹樹見容輝

寄詢鍾伯敬

林子歡遊楚鍾生好品詩秋深竟陵夜江冷鄂城祠  
問訊遲難發形容見未期馬牛風不及契合寸心知  
杪秋同黃貞父邀熊侍御飛卿遊靈谷寺暢飲

至夕陶然有作

晨熹陵闕東逶迤接祇宮深松十里霧嘶入五花  
驄丹嶂儼畫裏疎碧間殷紅古殿出雲氣遠與滄江

通地靜秋日淡塔孤遙天空登陟藤蘿上翩然御清  
風興延遲客發賞殊欣心同幽閒不辟人遽如離樊  
籠往往意氣真見之酒杯中譚禪或說劍醉眼凌星  
虹晝短寺門暝餘酣應未窮豈必習家池酩酊稱山  
公御史昔按塞威風行無終却笑并州兒荏弱等童  
蒙奮臂左右擬力挽三石弓我聞熊渠子射石千古  
雄爲君歌激烈側佇天山功

侍御最善射席間  
縱談輒引之篇未

送沈尊師之任蜀中僉憲

彩鷁秋風疎樹寒星文遙向益州看巡遊賸歷西南

盡曉諭驚聞父老歡雲氣疑來神女廟江流自轉使  
君灘瞿唐水落平於席歲莫應無蜀道難

江上別沈尊師

秋岼丹楓暫繫船相望萬里漢橋邊石城過鴈高雲  
黑巫峽啼猿暮雨懸負弩早聞驚邑里乘槎定卜動  
星纏江頭若弄南征笛不爲門生亦黯然

冬初留春堂山亭賞菊花得真字

冬閏黃花晚故新高亭落日在衣巾徐教片月侵相  
媚却妬繁燈映太真細蘂盈盈寒更放幽香拂拂遠

逾親留連不負霜前賞榮耀猶能似洛神

貞父招汎淮水分得齊字

榜柁清淮浦寒霓挂晚隄燈侵石橋暗袖拂畫欄齊  
水閣過雲淺江城上月低士龍原笑癖况復醉如泥  
冬初歸懷四首

吾道空留滯微官已歲時冬榮猶桂樹夕秀豈松枝  
聞見都無賴身名合用癡蕭條驚短髮感慨欲何爲

二

哀鴻愁際叫涼葉靜時飄短晷匆匆暮寒江夜夜潮

朝  
翳蚊猶颺日蒼隼必搏霄莫學梅生去難輕懟 聖

三

不少侏儒俸素心安食貧時時看怪事日日送歸人  
鄉里風存古山林性率真清狂非避患底事憶羹尊

四

家人期未至客鴈故頻來淡日淒寒浦浮雲暗古臺  
北山將怨侶南國自多才已辨消搖計時賢定不猜  
翳侯先生招同貞父應尼遊嘉善寺嘉石閣

朝旭散晴靄山色延孤清臺殿廠脩阜眺迴寒江平  
奇石亘錯落窈窕含空明陰罅乳倒垂半崖草細生  
松榭夾虛牖靜聞笙鏞聲削壁紀高文建標錫嘉名  
跡緣至人顯不獨娛心情昔遊已恍忽欣焉眷合并

梅花水

入寺翳灌莽背巘開豁落絕壁剝雲根芳池無盈涸  
稍解蒙泉義微比甘露薄空色倒山影澄光湛杯酌  
中庭白日寂古木慈雲著林巒互蔽虧脩竹上垠嶠  
得無卓錫出如聽清梵作信美瑩心顏不遠伊丘壑

幕府寺

一馬雲從時丞相帷幕開千年猶王氣昔賢空飛埃  
招提翳蘿幄古石又新苔興廢十數改茫茫我復來  
峰岑委紆餘落日登高臺驚飈衰木颯寒空鴻鴈哀  
四月歷茲地巖洞有崩隕陵谷遷須臾桑田等劫灰  
冥心觀物化落落何爲哉欲持壯盛年長江豈西迴

送吳光祿翁晉請假還里

舊識才俱盡新交興漸疎淹留時不覺請謁歲將除  
拙已徵逢世貧難賦遂初去來看亦慣爲爾稍躊躇

二

狂名猶滿世不必急知音江樹縈歸眼茗雲挂客心  
艱難慙乞米聚散暫開襟雨雪之家晚窮知歲月深

三

遲暮驚雙鬢蕭疎自一官江烏風定下湖鴈月明寒  
旅食頻應厭離歌老更難暫歸堪計日勸酒不成歡

四

去住只如此笑言聊解嘲鵲鷓原在野烏雀少安巢  
短柳低孤棹浮雲暗近郊清時大官署莫憶是窮交



至日雪

鍾山數月晴稍喜至日雪背檐人跡外時有白花結

二

帶雨故聞聲沾欄亦微凍何見一陽來隔水魚影動

讀鄭用章紀忠烈錄感賦

鄭公守睢陽惠化值時清盜賊不入境荒鹵有人耕  
追惟張許蹟千載儼如生日暮驚沙飛孤堞陣雲平  
山河時變色兒女舉知名纍纍京觀野燐燐陰雨星  
松柏哭庭陰遺廟空丹青祀事秩恒典雲旗悅將迎

每覽前古錄意激衝冠纓載讀忠烈紀憤血忽縱橫  
唐社幾不屋所賴一木撐妙略李郭資壯覓鬼神驚  
回風颯衰日蕩然泣精靈天地正百世來往翊休明  
徵古發幽衷陳詩感人情馨香道無隔簡帙擬麟經  
公實楨榦才表章以教貞仁者恒饑溺穆如暢德聲  
時事漸多異憂勞敢遑寧書生大跼躋兀兀愁天傾  
嗚呼助勩會哲匠始崢嶸不聞天寶際二公顯朝廷  
自顧孱弱質張皇終何成詩罷鬢欲白長歌激豪英  
冬日永慶寺偕同行步於謝公墩各分賦二首

寺幽如在野宛轉帝城隅翠竹房櫳隱蒼岷歲月孤  
壇陰依臥鹿塔日上歸鳥冬閨猶融冶清遊思未徂

二

白鳥棲枯樹青苔上野林雲深連嶺暗日近俯江沉  
來往晴兼雨悲涼後視今羣行笑語適天地有知心

冬夜同鄭應尼諸公坐貞父齋中次應尼作

玄夜燈花喜笑言三五人觴行隨意得座密接情真  
同宦過從有遷居氣色新歌童度妙曲漸放蠟梅春

喜秦山人京過訪

耳中秦京十五年將謂非我時世賢見之風期儼太  
古囊無一錢詩百篇烏啼霜落江城樹白日奔流不  
肯住對我為官較旅人天下滔滔終難遇一言投合  
大叫去茫茫破瓢挂何處

贈一齋陳子

有序

陳子名第閩人少棄諸生為叅戎旋復罷去  
為五嶽遊今年七十餘矣甫從嵩華歸又行  
縱舸楚越予觀其書及接其人伉爽激發能  
信詣所獨至不欺其志一何犖犖特君子  
也因與貞父觴之於菴醉後贈言予初知陳  
子以同舍林子因質契於焦夫子曰吾兩人  
者不能數月不見也貞父云夫陳子殆有寄  
焉而感憤於其所未盡也予觀今世數君子

則皆古之  
遺逸也夫

陳翁足跡遍天下七十之年觀太華時人無識故將  
軍灞亭不嗔醉尉罵生平好學恥腐儒詩書禮樂糟  
粕諸金椎錯落揮迷窟直令象罔探玄珠來往惟依  
焦夫子相對凝然清似水短垣霜淨倚仗外古菴雲  
深襍被裏庭空樹白暝天永丹顏亂髮方瞳炯舊跡  
時尋葛稚川松風自臥陶弘景只今鼓舵楚越遊乘  
興杳爾無倪舟茫茫俗物鳥過目君不見生前勞擾  
死卽休

冬陰同貞父命駕之報恩寺憩石鼎精舍因信  
步尋玄裝塔縱觀諸幽絕處時偕行馬生巽  
甫泉上人漫引長句

玄陰釀素景氣溫天固佳誰能坐屋底竝駕得吾儕  
四野將雪未雪時蒼蒼樹靜裊藤枝到寺始覺蹊徑  
碎入門頗遣竹柏疑逶迤層閣遞出入杳靄閒房相  
蔽虧小苑茶香不隔戶卷簾山開石林移馬生年少  
清機富更接泉公導引師深殿香薰金銀暗古栝霜  
明日月垂興長健步窮心賞落葉無人霾宿莽唐師

衣鉢葬寒丘白雲時來飛鳥上雨溜拱穴枯笋出岷  
崩半路屈松仰江山歲節誰復知緇流幽士閒來往  
却憶文皇締造晨宮殿峨峨伴鬼神浮圖迴屬虹  
霓下琉璃高矗碧落新那期劫火隨銷滅金階玉祀  
光如雪縱有因緣興不得乾坤俛仰寧終極以茲歡  
遊破百憂梅稍欲泄春消息君不見人世別離多前  
日事填委昨者逢迎復奔波杖屨之願屢蹉跎兀兀  
悲愁可奈何

普德寺新成華嚴樓同過寓目因讀焦太史碑

重閣神標倚太清冥冥萬象俯前榮翛然雲霧浮天  
闕不信金銀有化城早暮江山開幻影西南松柏落  
虛聲法因恍悟看貞石何限興衰萬古情

碧峰寺禪室

招提接近閒斜扉雪色四垂冬樹微細逕漸高行處  
失荒庭不掃到來稀旃檀古佛何年至杖錫鄰僧每  
夜歸雲物渺然天地外松吟鳥語故依依

天界寺同訪竹壑老禪遂過竹居菴小飲晚步

萬松菴復題十二韻

屢出不厭城邊寺屢遊不盡寺中山繁松眼與空翠  
入精廬心將形色閒老僧住世七十年又復三年未  
啟關白髮漸出燈龕黑青草不死苔痕斑陂陀忽憂  
宛轉內煙雪欲浮參差間觴行笑語破寂滅碧牕垂  
雲手可攀瞑陰少延叢竹暗几淨茶香春氣還興極  
何妨引徐步微醺暫許賒朱顏徙倚萬木擊石歌空  
林響合聞潺湲浚鳥雀羣歸殿閣靜物理人事俱循環  
百譴簿書寧足問三黜浮沉非是頑試看鐘鳴遠火  
出歲云暮矣虛朝班

二老詠

二老名德巋然並爲世師幸獲從遊實勤  
仰止雖篇章之妄擬要未足知言云爾

焦太史芻侯

太史體靈潛合撰如天地精心冥元化道器原不二  
註疏翻互見著作亦餘事忘筌老易解馬鄭俱軒輊  
方當北面時遽欲離文字恍覲太古前不盡聖者意  
李方伯本寧

芻冠石渠彥垂老歸藩方仕宦九州伯詞賦百谷王  
含納入衆壑子弟趨官牆居擬鄴侯架行無陸氏裝  
名姓借遊客不獨傳文章各厭長者意後生寧可忘

一逸詩

陳子季立

卽一齋也  
詳見他序

陳子大雅英生平寡所溺六經破頽腐九州八已歷  
談論斬藤葛陰翳開霹靂正直好昭晰鬼神匿揆剔  
旅食寄僧徒布幔貼土壁見之忽欣然肝膈一洗滌

六子詩

紀南中冬日一時之交  
也海內生平無及焉

黃水部貞父

貞父名蓋世王公與嘲笑制作豁心胸平遠舒窈窕  
問字富諸生才多饒同調交遊無不可領會得其要

劉比部載甫

載甫靜者流清白又家素往往鄙吝人媿見黃叔度  
佳句得苦索淡交出情愫宦拙亦油然嗜古獨深慕

柯民部季和

季和貌樸易與人若無方清廟闕崇邃主壁凝清光  
道協心去競情澹物俱忘才名亦不有名豈虞爾傷

蔡駕部伯達

伯也冰雪姿清心發慈相悟徹不二義和晬如春盎  
摘文體自然默識歸哲匠蕭灑釋形迹於焉寄宦沉

吳光祿翁晉

光祿少俊邁詩名固不惡失計滯官曹刺促翻寂寞  
腹餒大官米向人又顏弱嗟爾可憐生生平徒自謔

鄭水部應尼

鄭子蔚文采避俗如糞土水晶瑩心骨孔翠照毛羽  
四座臨玉樹玄言不輕吐悠悠視世人對予傾肺腑

金陵看春行

金陵小兒拍手舞爭唱竹枝趁街鼓碧牕凝煙大道  
樓銜服如雲妬朝雨彈瑟美人腸斷處一年兩度春

情苦臨春結綺望神僊錦被銀鞍逐絲鞭畫扇隔簾  
清盼出紗帽顫花微風前賓從合杳不聞語人家和  
霧欲昇天誰家少小女妖冶正堪憐更翻無愁曲四  
座皆泫然最傷畱滯宦遊時再折繁花梅滿枝欲寄  
遠人何處所高樓酒散長相思

迎春日同史紹卿邀本寧樓上眺望晚飲魏邸

西園時本寧在教前春之作輒依其韻數賡

示同遊

長干錦繡里令節帝王城魏闕雲邊迴鍾山霧裏平

青陽萬里動蒼后一元生得意兒童日銷魂士女情  
紛紛回鶻舞燦燦彩輿行朝雨輕難見非煙濕又晴  
土牛來磔兀竹馬笑將迎走索扶神立跳丸按隊呈  
寶鈿遺巧燕春勝展雛鶯泥滑官廊擁樓喧客席爭  
本根 太祖遠寬大聖人宏月令欣頒政時和見勸  
耕散曹聯轡適先達接襟榮卽事羈心入逢辰短髮  
驚弘農三度往具魏十年輕百戲俱荒忽同遊略姓  
名歡娛畱趙瑟哀思抵秦箏正似馮唐少何知曼倩  
精麗園方晚賞佳句屬先鳴氣煖梅枝馥香微竹葉  
賡

清臺猶傷結綺池欲學蓬瀛日月高簷拂風雲古樹  
橫罷歌憑想像餘樂悵崢嶸隔歲陽春曲巴人未易  
立春後夜同僚凌兄招飲聽公子亭倩彈琴歌  
凌侯好善心每苦見我傾倒不及語簡率略用家人  
誼一揖而坐忘爾女禮盛盤餐豐抑未仁徵僮僕馴  
相與公子弱齡特異姿皎月亭亭珊瑚枝燈明酒渴  
香氣煖拂拭龍脣一撫之蒼龍匿吼白石裂天晶霹  
靂來相追海水青冥赤鯉逝波濤蕩瀆傷別離又如



良濟集 卷四  
瀟湘洗春雨雲中君下翻翠旗幽澗泠泠獨鳥叫洞  
房珊珊環佩遲悠然乍止冬山立倏忽奮作風雨集  
餘韻不銷蘭蕙愁能事真令鬼神泣予昔好此歲月  
深指弱腕澀寧稱心雅奏向人或恐臥乾坤何日多  
知音空庭月出人聲靜微酣觸處見真性君家父子  
海內無吾言不信問范迂  
迂亦座客

元日雨雪

臘月奇熱飛蟲飛梅花太早春前稀人家欲除黯黯  
夕雨雪初弄纖纖輝打面松杉風不徹上顏椒柏氣  
猶微百官休怪朝衣重俱帶鍾陵煙霧歸

同黃貞父陸季高溫長卿憑虛閣雪望因就飲  
長卿齋中述事

帝城上日煙雪色凝晶膠寒凜後湖風遠素帶江郊  
萬家歲華內蒼蒼天地交寺冷僧寮閉徒倚聊解嘲  
同人諧所詣幽館翳林坳旨酒奪辛盤豐膳溢芳庖  
池塘發溫氣下或有蟠蛟芹藻漾淪漪柳映青青梢  
始聞斑鳩鳴稍俯馴鴉巢化美橋門跡情契理無殺  
一往極歡暢卽事徵拔茅庶幾應時合我輩豈星匏

再日貞父招同前客遊瓦官寺便過顧園還命

酌吳園

古寺鳳臺畔新竹冥雪色春風亦到門客子故相識  
靄靄青蓮閣陰陰素林黑畫壁已蕭條不見虎頭蹟  
茲地富丘壑雲石依其側一區各得有曲巷成南北  
扣扉園丁啟疎聞忽我卽梅萼散幽馥短樹疑雕刻  
密房橫襟安偏牖通垣直酒氣融如春堦埒露於拭  
清歌傷緩急妙賞忘語默歡此一日宴何由知帝力  
撫物契所懷感遇聊祛惑頗得古人心性情尚無匿

焦先生招同貞父載甫紹卿吉祥寺探梅花

招提古梅人少知獨樹半畝橫離披暗雪霏霏時自  
舞香風片片莫輕吹先春已放寧禁得後日將空應  
怨誰對酒深憐憑護惜煙疎雨冷不勝思

燈夕分得佳字十二韻

南都燈夕兩俱仗主人佳卽事歡尤悵同人樂頗諧  
交輝渾不夜煖氣暢無涯珠斗巡簷竝瓊瑤接座排  
綴星移曲室奪月麗都街戲弄侏儒哭喧譁鮑老俳  
煙隨錦樹歇光似火齊偕已異兒童喜翻增聚散懷

威蕤薰巷陌宛轉引秦淮廊內尋遺屨橋邊拾墮釵  
目成傷越女腸斷思吳娃醉臉欹紗帽還騎果下騮  
方胥成二子見過追憶舊遊復檢贈章遂作二

詩弔胥成以示二子

交歡稱重客不憶幾何年名姓畱身後形容復眼前  
棄繻悲出塞絕筆賦遊僊風雨幽州夕孤魂若箇邊

二

生死無音耗賓朋有去畱舊詩看汗漫前輩果風流  
阮籍空青眼彪之早白頭不知嗔謝客實少此同遊

雪中杏花

春蚤欺杏藥日烘開已齊倚風欲微笑帶雪似深啼  
色冷香猶澀鬚含凍故低桃花聞醜面折取忍成泥

劉載甫招遊清涼臺

去春餞客登臺處有客招携又早春高低桃竹深映  
發遠近林亭相逼真城外帆檣江影動宮中樹木雨  
光新年華豈負爲郎日常伴看花載酒身

病中贈汪子汪善望氣祿命卜筮之術

少日無不得中年多所憂日非營四海身豈待千秋

辨說公卿失精微老易優吾將問王朔相固不當侯

二

蔡澤原無相公明豈但書生來聊復爾寧待問何如  
病益諳齊物愁將擬卜居惟應歸計是一壑老吾廬  
焦先生招同貞父載甫遊吉祥寺看山中桃花  
頻知風雨惡忽漫是清明十里城隅僻長天寺宇晴  
參差連嶺竹覲睨午林鶯爲愛桃花候俱知賸客情  
芬葩遠近合照耀淺深呈紅碧奇難有高低隱互迎  
目熒迷五色面重醉繁英笑日兼啼露蒸霞復爛瓊

武陵憶漁父鄴下惜劉楨次第皆開落分題異色名  
榮華真幻界觸發悟無生心賞常如此春光歲歲盟

劉載甫招陪焦先生黃貞父同遊蓮花菴

太平長隄天下無新綠古菴城一隅山媚湖明開病  
眼草香花艷軟春膚酒杯屢移徑曲折玄箸互發所  
歡娛侍坐爲言各知己翛然清興憶風雩

秦淮禊事 四言

淮流洋洋旁列樓居三日維已舊俗祓除傾都士女  
遊戲相娛仰墜翔鳥俯泳儵魚

風物柔美羅綺微寒容與清渚乘簡贈蘭桃葉度曲  
芍藥稱篇指彼流波覲子日言

爰集羣賢迨於觴詠鶯啼多陰蘭柵曲映寓目眩視  
傾耳餘聽微茫夕浦白日難暝

青溪之曲汎汎落花楊柳垂岍新竹交加小姑無郎  
心傷如何燕子歸來獨寤嘯歌

舊遊梅花水傷其巖壁之奇以僧寮蔽也予友  
黃貞父謀諸焦先生及衆君子撤而易之訖  
役復往觀焉幽賸都非曩有喜有此作亦賡

鄭子

林石俱昔有忽如天乍開借幽初迸笋好事密移梅  
寬讓雲根豁深容日脚迴名泉新氣色清切沁銜杯

二

野意非人造開穿體自然一新聊屋宇不障故雲天  
似得未曾有要令知者傳賦詩徵勝事默憶世因緣

送周晉明社友之廣南守

君胡萬里去予病未能過領郡亦不薄采風應未訛  
音稀迴鴈嶺暑渡站鳶波莫厭夜郎遠古來才士多

陶開普社丈擢守登州喜而有寄

名下除書領郡優初時粉署接風流早聞州邑知楊  
震歸及兒童訝細侯時予將歸齋閣迴懸鼇立柱金銀自  
結蜃爲樓使君不廢登臨興百尺蓬萊鏡裏浮

鄭應尼招同劉載甫吳之矩飲齋頭時予及二  
客皆將滿行言別分賦得逢字

去住深憐病後蹤酒罇猶在失從容能禁一別三人  
共敢料他年何地逢倚檻莫霞穿淺水隔簾疎雨散  
前峰夕陰把臂從茲遠爲記庭除落落松

觀秦淮競渡夜歌

南都五月濃煙薰樓臺宛轉清溪分波間岬上俱不  
見笙歌沸天更無聞蘭橈桂櫂錦錯亂朱榜銀題香  
續紛入夜華燈奪初月早時袷服揮深雲酒池肉陵  
各相向肩摩袂接千人行琉璃光映貝闕底綺縠影  
在星河上斷腸此日信歡娛續命何年復惆悵士女  
徒畱隔水魂陌橋漸歇中宵唱龍舟競渡又今時試  
問湘纍知不知神仙中遊亦難屢況我病起鬢垂絲  
哀箏細語使心碎興闌酒渴情如癡連夕對客頻聚

散爲賦將歸傷別離



